

## Abschied

Zum Abflugtagghoert leider au immer s tschuess saege und das isch echt nid eifach! Ha mi scho lang nuem so verschisse gfuehlt wie am Sunntig 1.10.2006. Nachdem all haend uufmoege, nach dae Promill-huettli Party, haend mir i dae Werkstatt g Aperoed! Und da moecht i au gad allne danke wo cho sind, es haet mich riisig gfreut! Nach mae churzae Stop dihei, sind mir denn au gad direkt an Flughafe ( Ha en mega stress gha, fuer nuet, chunt aber nachher gaad gnauer). I dae Bye Bye Bar haend mir daenn gmuetlich eis trunke (Mami, Papi, Tobi, Gotti, Marlen und Sharon), wo denn Carla (haet mit mir zaeme bi dae Jet gschaffet) cho isch und gseit haet, dasd British Airways nach London verspaetig haet. Also sind mit denn gad zu dae BA und die haend mich denn ziemlich schnell ufen Flug vo dae Swiss umbuechet, da ich min aanschluss Flug verpasst het. Es isch sogar en direkt Flug nach Bangkok gsii und da han i sicher nid nei gseit!!! Da dae Flug aber erscht 22:30 fluegt, han i mi denn vom Gotti , dae Marlen und dae Sharon mit Traene muese verabschiede! Ha ja a daem Tag scho mehreri Nastuechli bruucht, drumm haet mir dae Tobi die au immer gad scho parat ghalte:o)! Nach znachtesse und dae ganz Flughafe unsicher machae, sMami haet i jede Kiosk wellae go Tierli kuschle, und ere langsam kommende muedigkeit bi allne, ha i denn muese abschied naeh vo mine Etere und em Tobi! Chan eu da Gfuehl nid beschriibe, chan nur saege, das i viel, viel traene gha han und s mir zHerz fasch verrissae haet! I han mirs ja scho schlimm vorgstellt, aber dases so heavy wird, het i nid denkt! Dur Passkontrolle und scho im Flueger, bin so richtig uufgloest gsii, das i das gar nid alles realisiert han! Nachdem i dae Mall und .... no ufem Flueger troffae han, bin i ganz erschoeuft gsii und nachem Briefli lese, au schnell iigschlafe! Het doch no fascht dae zmorge verpasst vo luuter schlafe:o)!